

Type: Conference Paper
Source: Lalit
Date: FEB 2008

KONGRE INTERNASYONAL LALIT Fevriye 2008

Title:

"INTERNASYONALISM"

par RAM SEEGOBIN

KW. Lalit
International
Political Theory
Organization

Refleksyon lor internasyonalism pe vinn de plizanpli irzan, fas a devlopman Globalizasyon kapitalist. Klas travayer antye lemond pe fer fas a enn nivelman par le ba, dan serten peyi aköz presyon kapitalist pu plis prodiktivite ek konpetivite, ek dan lezot aköz delokalizasyon prodiksyon ver peyi ek mindev pli bomarse. Kapital pe penetre partu ek gran vites, tandi ki lalit klas travayer pe vinn pli inefektif onivo nasyonal. Pu nu kapav sitye deba lor "Internasyonalism" pli byen, kitfwa li nesese ki nu retras brievman listorik bann gran lide ek lorganizasyon otur sa konsep "internasyonalism".

Pu komanse finn ena lepok kolonyal, ek bann lanpir, sirtu Britanik, Franse, ek Espanyol/Portige. Sa ti lepok penetrasyon mod prodiksyon kapitalist partu dan lemond ek destriksyon bann sistem feodal ek tribal. Ek dekolonizasyon, penetrasyon kapitalism finn kontinye a traver institisyon kuma FMI, Labank Mondyal, ek pli tar, OMC.

Me pandan tu sa peryod finn ena bann refleksyon ek loganizasyon otur neseseite pu klas travayer dan tu peyi ko-ordinn lalit pu so emansipasyon.

Listorik

Premye Internasyonal (1864-72) (Working Men's International Association), ti met dibut par Karl Marx, ek ti reyni lasosyasyon travayer, parti politik, ek mem individi. Kuma nu kapav atann, ti ena plizyer diferan kuran politik ki ti ko-ekziste ladan: sindikalist ek mem anarsist. Dan Kongre Zenev (1866), bi Premye Internasyonal ti definir kuma: "Bi sa Lasosyasyon Internasyonal se pu fer enn mwayen santralize pu ki ena kominikasyon ek koperasyon ant bann sosyete travayer dan bann peyi diferan. Tu sa bann sosyete dan bann peyi diferan la ena mem bi, sey-a-dir, pu defann, protez, devlop, e liber totalman, klas travayer." (Revi LDK Septam 1978). Me finn ena buku lager dan lorganizasyon, sirtu ant Marx ek Anarsist Bakunin, ek finalman Premyer Internasyonal pa finn dire byen lontan.

Dezyem Internasyonal finn lanse dan Paris an 1889, ek ti regroup selman Sindika ek Parti Politik. Dan kumansman li ti pronn demokrasi parlamenter, me pli tar li finn adopte enn pozisyon Marxist revolisyoner. Dan Kongre 1907, finn vot enn rezolisyon propoze par Lenin, Rosa Luxembourg, ek Martov, pu ki tu bann lorganizasyon mam servi kriz ekonomik ek sosyal pu prepar pu revolisyon. Me kan Premyer Ger Mondyal deklare, Internasyonal split an 3, lor kestyon ki pozisyon pu adopte vizavi lager imperyalist: apre lager, bann parti sosyalist, sirtu dan peyi alye, met dibut seki ankor existe zordi kuma Socialist International (ki zordi regroup parti burzwa reformist ek mem nu PT).

Trwazyem Internasyonal pran nesans zis apre revolisyon sovyetik depi sa seksyon ki ti swiv Rezolisyon Lenin. Me depi kumansman mem ti ena an mem tan enn kuran an faver revolisyon internasyonal, ek enn kuran ki ti viz pu konsolid kontrol Sovyetik lor muvman kominis dan lezot peyi. Su kontrol Stalin, Trwazyem Internasyonal finn fer enn seri zig-zag dan so stratezi, ek finalman apre ki finn ena Pact Stalin-Hitler dan kumansman Dezyem Ger Mondyal, Internasyonal finn disud, sirtu pu Stalin rasir bann alye Elopein ek Amerikin.

Katriyem Internasyonal: deza an 1925, pandan ki Trwazyem Internasyonal ti ankor ekziste su kontrol Stalin, bann kominist pros ek Trotsky ti pe propoz formasyon enn lot Internasyonal ki finalman finn konkretize an Septam 1938 dan enn kongre an Frans, ek finn adopte Program Tranzisyonel Trotsky. Me dan bann lane 50, deba a linteryer IV otur latitid pu adopte vizavi sistem ki ti ena dan Linyon Sovyetik amenn enn nuvo kasir ant enn lel "Komite Internasyonal" ek enn lot lel "Sekretarya Internasyonal".

Zordi ena mem koze otur formasyon enn "Sinkyem Internasyonal", me refleksyon otur program ek form organizasyonel pa finn avanse buku.

Dernye 30 an.

Enn seri evennman finn bulvers tu refleksyon otur konsept "internasyonalism": parmi ena:

- Ekrulman Blok Sovyetik ek lafin bipolarizasyon lager firwad
- Eklatman SWP Amerikin ki ti ena buku linflians dan lagos o-nivo lemond
- Diferan regroupman otur bann Parti Trotskist Eropein, ki finn kree seki nu apel striktir "hub and spokes" kot ena enn parti ase for ek organize dan enn peyi eropein ki sey etabli enn regroupman lezot grup o-nivo internasyonal: sa kalite regroupman la byen suvan finn kree divisyon sekter o-nivo nasyonal dan lezot peyi.

Finn ena tantativ dan diferan regroupman pu elarzi baz ek linflians: Parti des Travailleurs (Franse) finn sey met dibut enn "L'Entente Internationale" ki resamble inpe Premye Internasyonal dan lesans ki li regroup Parti Politik osi byen ki sindika. Ligue Communiste Revolutionnaire (Franse) finn rant inpe dan kuran muvmman de mas kont FMI/BM, kuma "50 Years Is Enough", CADTM ek Muvman Altermondyalist.

Sa kuran Altermondyalist ki ti pran nesans apre gran manifestasyon anti-OMC dan Seattle ek finn kontinye ek bann gran rasanbleman WSF sak 2 an, li finn eksklir tu parti politik ek rasanble selman sindika, ONG, ek lorganizasyon sosyete sivil. Li pa etonan ki WSF pa kapav develop enn alternativ politik ek ekonomik a globalizasyon ki li pe konbat.

Pandan enn bon but letan, "internasyonalism" finn pran form enn muvmman solidarite ver enn peyi ki paret dan lavangard enn lalit: Kiba dan kumansman bann lane 60, Vietnam ver lafin bann lane 60, Sid Afrik ki ti pe lite kont sistem aparteid, ek zordi sa nwayo la finn al dan Sid Amerik, sirtu Venezuela. Me sa form solidarite, mem si li nesaser, li pa ede buku pu develop enn program ek enn form organizasyonel a traver lekel internasyonalism kapav exprim limem.

LALIT

Depi lepok Grup Lalit de Klas dan bann lane 70, nu finn tuzur sitey numem an opozisyon a kuran stalinyen dan Blok Sovyetik ek Lasinn. ek nu finn ena buku plis lyen organik ek programatik ek diferan kuran marxist revolisyoner: Ligue Communiste Revolutionnaire, Lutte Ouvriere, ek Parti des Travailleurs dan Lafrans, Socialist Workers Party dan UK, Workers' Organisation for Socialist Action dan Sid Afrik, ek Democratic Socialist Party dan Lostrali. Ek formasyon blok ekonomik Rezyonal kuma SADC, nu finn estime ki li nesaser organize o-nivo rezyonal an mem tan ki o-nivo internasyonal: nu finn pran linisyativ pu met dibut enn Rezo Lafrik Ostral/ Losean Indyen ki finn debus lor enn rasanbleman SEAF an 1995. Enn delegasyon Lalit ti prezan dan enn Konferans dan Cape Town an Desan 1997, kot ti met dibut International Network for Socialist Action (INSA) ki malerezman pa finn ena buku lavenir.

O-nivo internasyonal, nu finn sey partisip dan WSF (Porto Alegre, san sikse), me finalman nu ti reysi partisip dan WSF (Mumbai), ek nu finn fer lexperyans difikilte develop enn stratezi internasyonalist a traver enn rasanbleman apolitik kuma ena dan WSF. Me dan Mumbai nu finn kanmem partisip dan lansman Muvman Internasyonal Kont Baz Militer ki finn organiz Premye Konferans Internasyonal dan Ekwador, kot Lalit ti prezan. An mem tan Lalit finn prezan dan 3 konferans internasyonal organize par L'Entente ant 1991 ek 2000, ek dan Konferans Solidarite Lazi-Pasifik, Sydney 2005. Nu finn egalman kontribye dan enn publikasyon internasyonal LINKS ki ti pe sorti a linisyativ Democratic Socialist Perspective dan Lostrali.

Malgre ki nu finn partisip dan plizyer diferan konferans ek rasanbleman rezyonal ek internasyonal, ek malgre ki nu finn ena buku refleksyon lor tem "internasyonalism", malgre ki nu realize ki li egalman nu responsabilite pu partisip dan kreasyon enn organism ki kapav exprim politikman sa internasyonalism-la, nu realize ki ena ankor buku deba ki nesaser.

Ram Seegobin, 24 Zanvye 2008